

Число 20.

Ужгород, 15. октября 1923.

Рочник III.

ВЛАХОВІСТНИК

ДУХОВНА ГАЗЕТА ДЛЯ ПОДКАРПАТСКИХ РУСИНОВ

Выходить двараз в мѣсяць
каждого 1-го и 15-го.

А ДРЕС:
редакції и експедиції:
КІРІЛІКСІА „ВЛАХОВІСТНИК“
Uzhgorod, Kapitulska, 3.

ПРЕДПЛАТА:
на рок 12.— К
одно число60 К
За границу 20—. К
До Америки..... 1 Д.

ОБЯВЛЕНИЯ
принимаются по днівъ
за 1 сторону .. 200 К
за 1/2 сторону .. 120 К
за 1/4 сторону .. 65 К

Христіянска політика.

Всягды, где шизматицка лютость — як бѣсный вовкъ — напала на наши права и ногами топтала наши найсвятѣйшѣ сокровища — мы вѣрно приказу Христа не отвѣчали подобнымъ брутализмомъ, но постоянно отзывалисме ся на оборону законовъ. Се знершу не помогло, бо по войнѣ законы такъ услили, что и сама верхность не могла ихъ въ декотryхъ слушаючи перевести. Но нынѣ уже лѣпшій порядокъ есть въ республицѣ и если република хоче истновати и на ділліце, мусить съ наибольшою енергією перевести всѣ закони и всѣ законнѣ розпоряженія.

А се бы была смерть для шизматицкой вѣры. Бо у нихъ все инише е, только закона и законности иѣть. Все, что они до теперь робили, то есть топтанія всякого Божого и людскога закона. И якъ пріиде часъ законнаго житя, коли законы достануть свою силу, тогда шизматики должны навернути всѣ ограбленія церкви и всѣ шкоды здѣланнѣ своими беззаконіями.

И се шизматики добре знаютъ. Айбо знать и приготовити ся до сихъ часовъ. Они теперь въ союзѣ со своими ческими „братьями“ всѣми силами стараютъ ся на то, чтобы приготовити такъ законы, котрѣ бы ихъ оставили въ уживаню тыхъ правъ, якихъ собѣ здобыли незаконными средствами. Уже и читати въ новинкахъ, что сего року чехи намѣряють такій законъ завести, что тамъ де шизматики суть, тамъ церковь спольно будуть хосновати и гр. каѳолики и кривославнѣ. А на

се згодити ся оденъ честный христіянинъ, кто любить свою вѣру — ніякъ не може.

— Айбо якъ законъ дозволить шизматикамъ зайти въ нашу церковь ?

Одноко отъ тебе — христіянскій народе — зависить, обы такого бозбожного закона не было.

Знаешь, кто законы принесе ? Законы готовлять ся въ Празѣ, в парламентѣ, и готовлять тотѣ люде, котрѣ ты христіянскій народе посилаешь въ той парламентѣ, тотѣ такъ званѣ послы, которыхъ ты выберешъ на выборах. А якихъ ты выберешъ, такѣ законы ухвальять въ парламентѣ и таким законамъ будешь ся повиновати ты христіянскій чоловѣче !

Та зато дуже уважай !!

Если не хочешь, чтобы твою церковь оскверняли котѣши, кондаши, гусопаси и Богъ знае якѣ пройдисвѣты,

если не хочешь, чтобы батюшки напыхали своѣ кешенѣ твоими тяжко заробленными геллерами,

если не хочешь, чтобы твоѣ дѣточки воспитали ся безъ вѣры, въ ненависти,

если не хочешь, чтобы твою душоу управляли такѣ одиницѣ, котрѣ ледвы читати писати знаютъ,

если не хочешь, чтобы тебе сповѣдали такѣ „священники“, котрѣ Богъ знае ци суть священѣ ци нѣть,

и на конци если не хочешь съ тяжкою совѣстю стояти колись передъ вѣчнымъ Богомъ, передъ твоимъ судією,

тогда не выберай на тыхъ выборахъ такихъ пословъ и не подперай таку партію, котра въ парламентѣ готова такѣ законы пріяти и ухвалити !!

Зато русине-христіянине держь ся разуму ! Позерай добре вождовъ партіи, ци не находяться меже ними шизматицѣ агитаторы, пяницѣ, люде роспustного житя, або такѣ, котрѣ церковь лишь изъ вонку видять, або котрѣ говорять, что кожда вѣра добра. А отъ такой партіи варуй ся якъ отъ ворога твоей вѣры и твоего душеспасенія.

Бо горе тобѣ, и горе твоей вѣрѣ и твоей церкви, если такѣ люде и така партія будуть для тебе законы творити въ пражскомъ парламентѣ.

И если найдешь меже нынѣшними партіями таку, котра всегда щиро защищала христіянску гр. каѳ. православиу вѣру въ газетахъ и на собраніяхъ, если упомниашь, что вожды той партіи суть добрыми христіянами и честными людьми, тогда подпрай ту христіянску партію и тогда, если непріятель всякими клеветами обметають ї.

Бо — не забудь — якѣ законы ухвалять тобою выбранѣ посли, такимъ законамъ маешь ся повиновати.

(б)

ІЗ ІСТОРИЇ ЦЕРКВИ

Фотій и Керуларій.

Больше як за 1000 роков всѣ христіяне — не говорячи о пробних ересях — не только одну вѣру исповѣдали и сочлиши одну вселенску Церков, но однообразно признали римскаго епископа верховным учителем и головою Христовой Церкви.

Пи жаль, теперь нерукотворенѣ ризы господнѣ порванѣ, и вѣт христіянскій разпался на двѣ головнѣ части, и западна и восточна Церков, за 1000 роков братя, як непріятель стоять супротив собѣ.

Кто се причинив и кто має за се отвѣчати перед Богім судом? На сей важный вопрос най дає отвѣт исторія церковна.

Епископы константинопольскї, як епископы спомянутого города все стремилисѧ на большу почесть и власть. Из-дяки императоров легко удалося им освободитисѧ из под власти своих митрополитов и привести халкедонскій собор до того рѣшеня, чтобы признавше первенство римского престола, первое място послѣ римского папы занимав царьгородскій епископ. Римскій папа св. Лев Великій понеже сіе рѣшеніе унижало старшѣ партіаршѣ престолы: александрийскій и антіохійскій, сіе рѣшеніе собора не утвердив и в посланію своем к епископу константиноп. Анатолію запретив

пользоватися сим рѣшеніем. Анатолій и другъ лѣпшъ его наслѣдники повиновалися сему приказу. Но не всѣ были такъ послушнѣ. Оден из честолюбивых константинои. епископов, Иван Постник став себе величати „вселенским патріархом“ як бы он быв головою всей церкви. Тогдашній папа св. Григорій Двоеслов, желающи показати примѣр сміренія, став себе титуловати: „рабъ рабовъ Божих“. Но се не много помогло; царьгородскѣ епископы свѣдомо стремилися к тому, чтобы их престол уровняти с римским престолом, что в концѣ повело до схизмы т. е. до цовного церковного разрыва. Сей открытый разрыв явився в IX-ом вѣцѣ и виновником его быв *Фотій*.

Царьгородским императором быв в то время малотѣтный Михаил, мѣсто кого его стрыко Варда управляв греческою державою. Царьгородским епископом быв тогда св. Игнатій. Варда жив цѣлкомъ роспустный живот, жив с своею невѣстою в незаконной связи еще при жизни своей жоны. По поводу сего грѣшного житя, св. Игнатій в самый праздник Богоявленія отказал ему дати причащеніе. Збуреный про се Варда насильно зложив св. Игнатія из цатр. престола и выгнав из державы. На мѣсто же Игнатія поставлен быв Фотій, чоловѣк готов невидѣти роспустну жизнь Варды.

Фотій тогда быв еще свѣтскій чоловѣк, без всякого священнического сана; впрочемъ ученый, но высше мѣры гордый и честолюбивый. Посвятив его за патріарха отлученій от Церкви еретик, епископ Григорій сиракузскій, бо из правовѣрных епископов никто не хотѣв его рукоположити. Фотій — як и всѣ епископы — дуже добръ зная, что без согласія римского епископа нич не стоить его избраніе, зато послан посольство до Риму и заявивше, что понеже Игнатій добровольно оставил патріаршій престол и он есть избранным от царя и народа, просить утвержденіе апостолскаго престола. Папа Николай послав своих уполномоченных у Царьгород перезнати як дѣло стоить, но Фортіови удалось подкупити послов и склонити их на свою сторону.

Под тим часом св. Игнатій страдав в темницѣ. Переносили го из едной до другой, мучили голодом, подкупленѣ свѣдки обвиняли его страшными грѣхами, заковали его в кайданы, лиш чтобы отказався от своего патр. престола. Но святый страдалец никаким образом не хотѣв оставить свое духовное стадо и передати вовкам хищным. Раз, коли святый от цѣлоочного мученія дуже у slab, посланники Фотія хватили его руки и насильственно начертали на папері крест. На том папери пак Фотій написав отреченіе Игнатія от престола; крест мав замѣстити подпись Игнатія.

По сем отреченію Игнатія освободили и он зараз заявил

цѣлое дѣло римскому епїскопу. Коли папа Николай дознався правды, созвав собор, на котром Фотія за его незаконное и немудрое поведеніе отлучили от Церкви, разом строго покарали и послов, что далися подкупiti и затаили правду.

Фотій учувши рѣшеніе собора страшно розярився, открыто выступив против цѣлой западной Церкви, обвиняючи ѿ вгубленіем вѣры, навѣть посмѣлився выключити из церкви верховного пастыря, видиму голову Христовой Церкви и наследника апостола Петра, римского епископа.

За житя Варды справа Фотія добрѣ стояла; но новый император Василій зараз як ступив на престол отдалив Фотія и возвратився на патр. престол знов Игнатій. Як о сем увѣдомили папу он созвав собор VIII. вселенскій; на сем соборѣ Фотія совершенно отлучили от Церкви, понеже найдовся винником в многих злодѣяніях и не покаявся. Разом знов опредѣли торжественно, что каждый истинный христианин должен признati римского епископа видимою головою церкви. Св. Игнатій быв утвержден на патр. престолѣ, до спокойно управляв своею Церковю до смерти.

По смерти Игнатія удалось Фотію склонити императора на свою сторону и знов заняти патр. престол. По закону Фотій зараз послав письмо к папѣ для утвержденія. Папа Іоанн VIII. не хотѣвше больше споров в хр. церкви, подвердив Фотія, но под тим условiem, если он испросить прощеніе и покаеся перед созванным собором. Се не любилось гордому Фотію, то не было по его натурѣ. Что робив чтобы избѣгати сіє пониженіе? Сфалзификовав посланіе папы так, что вылишив все что было ему не в дяку и записав о побѣдѣ всяких облестивъ выраженія; на соборѣ принял гордо порицо мѣсто и заявиив собору, что между ним и папою настали добрѣ отношенія.

Коли Фотій знов на престолѣ сидѣв, почав зневажити папостольскій престол и обклеветати римскую Церковь, якбы она импортила правдиву вѣру. Про се Фотій так от Іоанна VIII, як от слѣдуючих пап повторительно отлучен быв от Церкви.

По не довго радовався Фотій сему смутному розколу, бо по смерти императора Василія он хотѣв посадити на царскій престол одного своего родственника. За се Фотій арестован и выгнан быв из имперіи. Его наследник Стефан получив папское утвержденіе.

От сего часу за 150 лѣт восток в добром отношенію быв с папским престолом, всѣ епископы и патріархи признали первенство римского престола. Новый и до днесъ не улученный розкол повстав, коли появився на царьгородском престолѣ Михаил Керуларій.

Сей необразованный, честолюбивый чоловѣк свое дѣй-

ствіе як патріарх почав с тым, что всѣ церкви и монастырѣ латинского обряда в Константинополѣ из личной ненависти приказав заперти; св. Дары из церквей выбросені в ногами потоптані. Потом выдав циркулар, в котором обвиняє западну Церковь сякими дробними и неважними дѣлами як: западна церковь св. службу на прѣсном хлѣбѣ служить, что в субботу постять, что священники бритваются, что епископы на руках престень носять и т. д. (Боже, в имя яких дробностей бросив анаему Керуларій на всю западну церковь !)

Папа Лев IX. для переговоров с Керуларіем послав посолство до Царьгорода; император благосклонно принялъ послов, но Керуларій и говорити не хотѣв с нима. Папскѣ послы не могли иного дѣлать, принужденіѣ были Керуларію и его сторонников выключити из вселенской церкви. Грамота выключенія цублично положена была на главный престол церкви св. Софії. Се было 16-го лютня 1054. р.; сей день есть смутным датумом схизмы т. е. отлученія греков от каѳолицескої Церкви.

Не удовга пришла черга и на Керуларія. Он почав бунтовати против своего царя, замѣшившися в свѣтську політику, став носити царску одежду, за что заарестовали и выгнали го из имперіи. Умер в чужинѣ.

Схизма докончена Керуларіем глубоко пустила корѣнь в греческой Церкви. Императорам полюбився новый порядок вещей, бо по сему патріархи цѣлком подпали в их власть. Народови перестали говорити о папѣ так, что народ помало забыв о первенствѣ и главенствѣ римского престола. Греки желаючи лѣпше укрѣпiti схизму, почали святым честовати виновника схизмы Фотія. Цѣкавое дѣло, что виедно с Фотіем греки почитают святым и Игнатія, даючи таким образом однаку честь и мученику и его мучителю.

Інтересантнѣ пророчества.

Якъ въ старомъ завѣтѣ были пророческѣ книги, такъ и въ новомъ завѣтѣ есть одна: Апокалипсисъ. Содержаніе ей отношаєся на тогдашнѣ обставины св. Церкви, коли ю св. Іоаннъ писавъ, но по мнѣнію св. отцовъ пророческое значеніе мае, которое они не знали пояснити. Такъ на пр. св. Гіеронимій поносуєся, что въ Апокалипсисѣ „только таинствъ, колько словъ“ (Hier. ad Paulinum с. 7.). Такъ само и св. Августинъ твердить, что дуже мало ясной точки находить, котру якъ ключъ для дальнего порозумѣння темного содержанія Апокалипсиса употребляти бы могъ.

Св. Духъ е по словамъ Спасителя ; „той, кто вы научить всему и воспомянеть вамъ вся, яже рѣхъ вамъ“, (Іо. 14, 26) — учитель Церкви. Якъ еденъ учитель, поедиѣ правды своему ученику наразъ не выяснить, но лишь позднѣйше, коли е уже зрѣлый на то, правѣ такъ и св. Духъ, гдекотрѣ правды въ Апокалипсисѣ темными словами списаниѣ лишь позднѣйше дозволивъ порозумѣти и пояснити.

Сю превелику ласку поясненія темныхъ мѣстъ Апокалипсиса доставъ Вартооломей Голзгавзер, нѣмецкій священникъ въ 17. столѣтію. Онъ родився въ р. 1613 в селѣ Лаугна при Авгсбургу, умеръ въ р. 1658, якъ священникъ и деканъ въ Бингенѣ. Вже якъ 11 рочныи хлопецъ сказавъ своимъ родичамъ, же на дорозѣ видѣвъ Спасителя с Пр. Д. Маріею, а на небѣ еденъ превеликій ясный крестъ и отъ того часу онъ отличився съ вышною ясностю розума. Коли го за священника рукоположили, такъ его еденъ профессоръ характеризовавъ: Понеже Вартооломей часть студій исключительно на молитву употреблявъ а что учитися мавъ, то лишь разъ поверхостно перечитавъ, но на только совершенно знатъ, что твердити можно, же ему всѣ науки подалися отъ Бога. Окремъ того его животописатель твердять, что онъ и съ пророческимъ духомъ бывъ наполненъ и много пророчества предсказавъ.

Голзгавзер изясненіе Апокалипсиса написавъ Тиролскому Леогенталу, коли его Богъ съ разными смутками постѣтивъ и цѣлѣ дни отъ свѣта отдаленно безъ ъдѣня и напитка перевю. Коли еще и яъ Пасхальный понедѣльокъ постивъ, пыталися знакомѣ, прочто постить въ такое великое свято. Онъ отповѣдавъ: Іисусъ Христосъ въ сей день изяснивъ своему ученикови тайное значеніе св. письма и ему давъ порозумѣти найтемнѣйшѣ мѣста Апокалипсиса, котру книгу уже отъ давна многоразъ хотѣвъ порозумѣти, но до сихъ поръ даремно трудився, теперь але потребно ему постити и всѣ душевнѣ силы свои напружати, чтобы чѣмъ яснѣйше списавъ правдивое значеніе сей книги. Разъ говоривъ, что при писаню такое чувство мае, якъ tota дѣтина, ктора пише, но руку еї другій направляе. Онъ изяснивъ Апокалипсисъ лишь до 15-ої главы и коли знакомѣ просили го, чтобы продовжавъ сочиненіе свое, онъ отповѣдавъ, что не може далѣй изяснити, бо св. Духъ уже оставилъ его, но приїде часъ, коли найдеся такій, кторый довершить сочиненіе его.

По толкованю Голзгавзера 7 церквей Малой Азіи означаютъ 7 епохъ св. М. Церкви. Къ симъ церквамъ написаннѣ листы содержаютъ будучу исторію сихъ епохъ св. М. Церкви.

I. епоха сѣйбы (сѧнія) держить отъ первого Русаля до пренаслѣдованія Церкви отъ Нерона, коли апостолы зерно слова Божого розсѧли по свѣтѣ. (Та епоха отповѣдае 1-му дню створенія свѣта, коли Богъ створивъ свѣтлость.)

II. епоха плодоторенія держить отъ Нерона до Великого Константина, коли по словамъ: „Кровь мучениковъ е зерно христіяновъ“ кровь мучениковъ оплодотворила св. М. Церковь.

III. епоха освѣщенія, отъ Константина В. до Карла В., коли науку вѣры св. отцы и вселенскѣ соборы освѣтили противъ еретиковъ.

IV. епоха мирного положенія отъ В. Карла до V. Карла, т. е. правдивый середній вѣкъ, коли св. М. Церковь найкрасше процвѣтала и власти свѣтскѣ идею: „Treuga Dei“ предъ очами тримали.

V. епоха скорби держить отъ V. Карла до часовъ святого и могучого папы (Alleinherrscher), есть та епоха, въ которой мы жіеме. Въ сей епохѣ ересы и безбожность много скорби и смутку причинять св. М. Церкви.

VI. епоха потѣхи держить отъ часовъ святого и могучого папы до рождества Антикриста. Скорбам св. М. Церкви конецъ учинить еденъ отъ Бога избранный святый папа, подъ которымъ ересы уничтожаться, штаты его разпоряженіямъ подвергаются, краина Турковъ на малу територію стиснеся и поганскѣ народы толпами ступять до соборной Церкви. Буде много пра- ведныхъ и высоко-ученыхъ людей и люде будуть законъ и справедливость любити. Буде покой на „цѣлой землѣ“, бо Божа помочь власть діавола уменшить ажъ до часовъ рождества Антикриста.

VII. епоха безумїхъ держить отъ рождества Антикриста до конца свѣта. Въ сердцахъ многихъ вѣра и любовь выгасне, Антикрістъ велику свѣтску власть оснуети и причинить остат- ное, найужаснѣйшое пренаслѣдованіе св. М. Церкви, изъ котрого она побѣдоносно выйде. Тогда прийде Сынъ Божій и съ Нимъ страшный судъ.

По толкованію Голзгавзера мы въ V, епохѣ св. Церкви жіеме, котра почалася съ лутеранизмомъ. Ересы, свободнѣ мурады, матеріальнѣ соціалисты и іншѣ безбожники много скорби при-чинять св. М. Церкви. Если толкованіе Голзгавзера поровняеме съ пророчествомъ св. Малахія, видиме, же теперъ уже на концѣ той епохи скорби жіеме. Теперъ має слѣдовати на Римскомъ престолѣ „Angelicus Pastor“, т. е. „Ангелскій пастырь“, котрого панованіе означує начало нової епохи, по толкованію Голзгав- зера б-ої епохи потѣхи.

Отче нашъ, най прийде царствіе твоє, най прийде чѣмъ скорше золота епоха св. М. Церкви. Аминь!

A. K.

Священники не забудьте засылати предплаты
и розширяти меже вѣрниками „Благовѣстник“!

У вѣрѣ найдеме спасеніе души нашої.

Апостольска подорожь Его Преосвященства о. Дионизія, єпископа Пряшевского.

Его Преосвященство Епископъ *Діонізій* дня 26-го зновъ завитавъ между Карпатами, абы 27-го на праздникъ Воздвиженія Креста окончивъ архіерейску Службу Божу на горѣ Буковской, въ монастырской церкви Ч. св. Василія Вел.

Владыка дня 26-го поѣздомъ пришовъ въ Бардіевъ съ о. *Іоанномъ Коротноки* крилошаниномъ и съ Дезидеромъ *Шудихъ* богословомъ. На бардіовскомъ стаціонѣ витавъ ихъ о. *Емануїлъ Бигарій* тит. каноникъ. Съ Бардіова на автомобилѣ рушилися къ Стропковамъ, въ дорозѣ къ нимъ приключилися о. *Іоаннъ Галько* деканъ орлихскій, о. *Николай Данько* деканъ свидницкій и о. *Миронъ Петрашовичъ* парохъ сорочинскій. О 2. год. по полудни дошли до *Стропкова*, где ихъ обчековали о. *Вікторъ Чисарикъ* ломнянскій парохъ, о. *Меѳодій Трнка* и о. *Станіславъ Некула* члены Ч. С. Іисуса. О 3-ой год. Его Преосвященство посѣтивъ приходъ *Бокшу*, о 5. год. *Вишковци*, а о $\frac{1}{2}7$ -ой год. дошли въ *Буковецъ*. На всѣхъ приходахъ съ великою радостю и любовію витали вѣрники своего Архипастыря. Владыка у всѣхъ церквахъ окончивъ молебень и науку давъ людямъ, абы ихъ покрѣпiti въ вѣрѣ, а люде съ слезами въ очахъ слухали слова своего Епископа, котрого они могли видѣти и съ нимъ говорити. Но особливо въ Буковцяхъ великимъ одушевленіемъ обчековали Владыку. Молодци выставили бандерію, котра пришла предъ Владыку ажъ до Вышковецъ Красно было видѣти сильныхъ, здоровыхъ русскихъ хлопцовъ на коняхъ. Въ Буковцѣ у дверахъ церкви о. Ярославъ *Капишинскій* деканъ, красными словами витавъ Владыку. Церковь была переповиена людьми, може ани одинъ чоловѣкъ изъ села не зоставъ дома, бо всѣ тримали собѣ за повинность своего Епископа въ церкви витати. Владыка у церкви окончивъ параклисъ и науку давъ о томъ, якій мае быти добрий християнинъ, якъ мае каждый вѣру свою греко-каѳолическу сильно тримати и хранити. Владыка дуже велику душевну радость мавъ, когда вѣрники буковскѣ заявили ему, что передъ двома днями появився между ними вовкъ, котрый хотѣвъ ихъ вырвати изъ овчарнѣ Христової, по они вовка-батюшку прогнали, бо отъ Церкви Христової за жадну цѣну не отступлять.

Дня 27-го праздникъ Воздвиженія Ч. Креста. На буковской горѣ появилося множество народа изъ далекихъ крайовъ, принайменше 2000 людей было тамъ. Рано отъ 6-ой години зачали о. священники сповѣдати и Службы Божѣ кончити, такъ что каждый кто лемъ хотѣвъ сповѣдатися высловѣданый бывъ. Число причастниковъ было около 1.200. Отъ 6-ой год. такъ само и Службы Божѣ кончили въ каждой годинѣ и при каждой Службѣ и коротка проповѣдь была.

Его Преосвященство изъ Буковця съ процессією выйшовъ на гору, где всѣ священники съ процесіями и цѣлый народъ его чекали за монастыромъ. Ту витавъ его о. Булик Ч. св. В. В. изъ Мукачова щирими, изъ сердца происходящими словами. Передъ церковю бывъ поставленый олтаръ, возвышеный, абы народъ видѣвъ всѣ красы отправы архіерейской Службы Божой. Якъ импозантное было привитаніе и входъ Его Преосвященства, така импозантна была и Служба Божа. Олтаръ обкруженый отъ всѣхъ священниковъ и отъ народа доокола, а на серединѣ при олтарѣ Архіерей жертвовавъ за стадо свое облюбленное. А проповѣдь изъ его устъ апостольскихъ каждый съ наибольшимъ вниманіемъ и въ тиности слухавъ. По мированю и обходѣ церкви съ Архіерейскимъ благословленіемъ всѣ люди покрѣпленѣ и утѣщенѣ наукою своего Архіерея, въ наибольшой тиности, переповненѣ побожностю розойшлися.

Такого отпуста сей монастырь на буковской горѣ еще не мавъ!

Дня 28-го Владыка уже въ Гаваю бывъ; тутъ сповѣдавъ, окончивъ архіерейску Службу Божу, проповѣдавъ и послѣ обѣда посѣтивъ церковь въ Полянахъ и приходъ Микову.

Дня 29-го архіерейска Служба Божа была въ Дричной съ проповѣдею. Послѣ обѣда посѣщеніе церквей въ Сухой, въ В. Владычи, Н. Владычи, въ Маковцу, въ Сташковцахъ, а на ночь знова вернувъ до Буковца.

Дня 30-го архіерейска Сл. Б. была въ Буковцѣ, где множество народа пришло изъ окличныхъ селъ. Послѣ обѣда посѣщеніе церкви въ Вилшавки и прихода Шелестковци. Оттуда Преосв. Владыка перешовъ до Выславы, где могъ видѣти красну церковь, на котру и замѣтивъ, что то есть „мала катедралка“. Вечеромъ о $\frac{1}{2}$ 10 год. дойшовъ Владыка до Малой Бережнички. А ту хоть якъ ночною годиною прійшовъ, народъ обчековавъ его, такъ само бандерія ажъ въ Вишковцахъ обчековала и допровадила Владыку въ такъ скрытое село. Его Преосвященство самъ перве до церкви пошовъ поклонитися Найсвятѣйшой Евхаристії, подяковавъ Іисусу, что его и тамъ допровадивъ къ своимъ добрымъ овцамъ, котрѣ справдѣ красный доказъ дали своей вѣрности до своего Архипастыря.

Дня 1-го октября архіерейска Сл. Божа была въ М. Бережнички съ проповѣдею. Передъ Сл. Божою Владыка и притомное духовенство сповѣдали. О 12-ой год. рушивъ Владыка посѣтити приходъ въ В. Олшавахъ. Въ Стропковахъ доставъ смутну вѣсть о смерти великого пріятеля церкви гр.-каѳолической, великого працівника унії церкви россійской, архіепископа Стояна. Понеже та смутна вѣсть поздно дойшла до Его Преосвященства, на похороны самъ не могъ пойти, за что ему дуже жаль было — но токмо телеграфично выславъ своего заступ-

ника. О 2. год. по полудни дойшо Владыка до Н. Олшавъ. На дорозѣ чекавъ его о. Иреній Довгій парохъ съ В. Олшавъ и бандерія. У Н. Олшви витавъ его п. Перчина, окружный начальникъ изъ Гиралтовецъ. Посѣтивъ храмъ и о 3-й год. уже бывъ въ В. Олшавахъ, где окончивъ молебенъ Божой Матери, а по обѣдѣ вернувшись до Миньовецъ, где окончивъ молебенъ и проповѣдавъ. Ту его въ дверяхъ церкви витавъ о. Георгій Невицкій и переповнена съ народомъ церковь. Ступивше въ храмъ красивымъ спѣвомъ витала его школьна молодежь и старши под проводом п. Михаила Сухого, учителя.

Дня 2-го октября архіерейска Сл. Божа была въ Брусници съ проповѣдею. По завтраку котрый бывъ въ домѣ о. Николая Подгаецкого, о 12. год. Владыка рушився до Рафайловецъ. Брусницка красна бандерія выпровадила Его Преосвященство ажъ до Миньовецъ, где Владыка сердечными словами подяковавъ хлопцямъ за щиру любовь до него. О 3. год. приїздъ до Рафайловецъ. Бандерія чекала ажъ въ В. Домаши. Люде сердечно поздравляли Владыку и на колѣна припавше отримали Его благословеніе. Особливо красна подъя была при Голчиковцахъ, где одинъ пастырь маючій 200 овецъ припавъ на колѣна просяще благословеніе отъ пастыря овецъ Христовыхъ. Въ Рафайловцахъ Владыка окончивъ при олтарѣ чудотворного образа Божой Матери параклисъ и проповѣдавъ о любви до Божой Матери. По обѣдѣ въ домѣ о. Августина Шудиха Владыка вернувшись до Ломного, где вечеромъ о 8. годинѣ дойшовъ. При церкви обчековавъ народъ и о. Вікторъ Чисарикъ сердечными словами витавъ его.

Дня 3-го октября Арх. Сл. Божа въ Ломной, сповѣданье и проповѣдь. О $\frac{1}{2}$ 11 год. рушився Владыка, абы посѣтивъ приходы на околицѣ Воронова. У В. Добрѣ але дорогу мусѣли перервати, туй знов чекали люде лат. обряда Владыку, на его же честь славну браму зробили, выстрѣлами можара витали якъ черезъ браму автомобиль перешовъ. О. Гудакъ съ народомъ при церкви чекавъ и Владыка при гомонѣ звоновъ по сердечномъ привитаню ступивъ въ храмъ, где окончивъ молебенъ за своихъ вѣрниковъ гр.-каѳ., якихъ мало есть у Добрѣ. Посѣтивъ домъ о. пароха Гудака, а поволаный бывъ на обѣдѣ до п. Ивана Гайдича нотара, котрому позванію Владыка задость учинивъ и завитавъ въ домъ своего вѣрника. По обѣдѣ о $\frac{1}{4}$ 2 год. уже били'сме у Седлискахъ, где красна бандерія чекала. У церкви витавъ Его Преосвященство о. Алексій Кубекъ. Владыка окончивъ параклисъ, давъ вѣрникамъ свою науку и дяковавъ за сердечный привѣтъ. — Отси, якъ его отъ Турянъ спровадили, съ слезащими очами пращалися съ Его Преосвященствомъ и вертали до своихъ назадъ, а Владыка пошовъ дале до Кажимира.

Дня 4-го въ Кажимиру была Архієр. Сл. Божа. Посѣтивъ

Владыка еще Чичаву, Глине, Петковцы, Рудльовъ а дня 7-го окончивъ Арх. Сл. Божу въ Чемерномъ и вернувся въ Пряшевъ.

По своей архіерейской дорозѣ Владыка повсюду розсъявъ свѣтлость вѣры. Слабыхъ укрѣплявъ, сильныхъ побуждавъ на дальший поступъ въ совершенности. И могъ мати и много радости, бо изъ того сердечного привитаня, якъ Его приняли всѣ священники и народъ, где лишь появився, могъ видѣти, что Его всѣ въ сердцяхъ мають, и не менше люблять Его, якъ и Онъ всѣхъ своихъ. Желаеме Ему, абы Господь Богъ давъ Ему много силы, абы могъ провадити всѣхъ насы къ лучшої будучности и счастливой вѣчности.

Сохрани Его Господи на многая и благая лѣта!

о. М. Петрашовичъ.

Новости

— Новый папскій нунцій в Празѣ. Новый папскій чунцій msgre Marmaggi дня 20. септ. (четвер) у полудне передав торжественно пану президентови свой довѣрительный лист и сесим начав свое урядованіе. Сесь акт одбывся звычайным торжеством. Нунцій идучи у палату президента быв витан почестным кордоном войска, а в самой палатѣ чекала го сотня дворскѣ стражи з музыкою. Нунція привезли кочіи, высланни за ним из двора пана президента. В едной кочіи сидѣв нунцій з побочником президента плуковником Гоппе, а в другой кочіи везся секретарь нунція monsg. Arrata. Як зайшов нунцій у палату, оркестра грала гимн папскій. — Нунцій передав пану президентови свой повѣрительный лист и промовив бесѣду, в которой указав на пріятельскѣ односини меж Св. Столицею и Чсл. Республикою и на тысяч рочнѣ традиціи чеського народа что до христіянскаго Риму. Пан президент одповѣв нунцію теплыми словами, обѣцяв ему „всяку подпору в благородной задачѣ, котру берете на себе“. „Было, казав, всегда моим убѣжденіем, же живот так одиниць, як и народов, мае спочивати на основѣ религійної правды“.

— Вѣра и — Россія. Найгорше переслѣдована вѣра из меже всѣх краин в Россіи. В том краю, о котором наш богообійный народ то думав, что там найчистѣйше сохранилася истинна „православна“ вѣра.

Большевики голосно кричатъ, что у них есть „свобода“ вѣры. (Так они сесю свободу розумѣють, як нашъ „православ-

Рок 1923.

„БЛАГОВѢСТИК“

Сторона 305.

нѣ“). Из другой же стороны, все можливо здѣлаютъ, чтобы зни-
щить вѣру. Так 3-го фебруара 1922. установили закон: „не
есть дозволено, навѣть и в приватных домах научати на вѣру
особ, котрѣ еще не мають 18 лѣтъ“.

Большевицкѣ урядники ходять из села на село и всяде
держать собранія против вѣры. Жадну вѣру не свободно роз-
ширяти, только — безвѣrie. Одень большевицкій комисар пошов
раз в оден сиротинець, где выховалося около 300 сирот от 6
до 16 лѣт. Перед сбѣдом дѣти почали молитися. По молитвѣ
встав червенный комисар и сю рѣч держав ко дѣтям: „Молодѣ
россіяне! До теперь то говорили вам, что е Бог, до кого маете
молитися. Но то лож и неправда. Не е жадного Бога. Дурили
 вас, чтобы ся повиновали. От сего часу вы свободнѣ“. Потом
звернувшись до директора сиротинца и казав: „То что я теперь
дѣтям говорив, то маете вы кождый день им повторяти перед
обѣдом мѣсто молитвы. Як се не зробите возьму от вас 10
дѣтей, и осуджу их на смерть“.

В церквах можно не только богослуженіе держати, но
и всякѣ лекціи, собранія, концерты, танцѣ, мозѣи и театральны
представленія.

Так то выглядает христіянска вѣра в святой Россіи. Так
упала „тверда православна“ вѣра, что теперь уже и Бога не е.
Видно, что она не была основана на твердом камени лиш на
пѣску; пришли вѣтры, бурѣ и знишили людьми созданный бу-
динок.

— Якъ ся удало батюшкови отпустъ держати? (Пря-
шевска епархія.) Ладомировскій батюшка Михіменко Виталіонъ
предъ праздникомъ Боздвиженія Креста пришовъ до Буковца и
ту хотѣвъ заложити царство кри-православія, намовлявъ на то
людей, абы ступили въ то царство, и просивъ подписи, абы онъ
могъ на буковской горѣ окончити отпустъ въ Монастырской
церкви ч. Василія Великаго. Батюшка хотѣлъ отпустъ кончити!
Отъ ڪоли пріяла церковь шизматицка науку о отпустахъ?
Можно отъ коли Троцкій и Ленинъ стали ей головою на мѣсто
царя. — Но буковскѣ вѣрники въ его царство вовче не ступили,
подпись ему къ конаню отпуста не дали; одно знали, что ба-
тюшка къ тому немае права, — и таку отповѣдь дали ему яка
ему належала: стратьте ся отъ нас, бо съ биткою пойдетe. А
сей отвѣтъ батюшка порозумѣвъ бо сей часть стратився съ по-
нежу нихъ. А о два днѣ съ великовъ радостью и съ любо-
вю витали сво го Праваго Пастиря Епископа, который окон-
чивъ отпустъ на славу Божу а не па соблазнъ людей, якъ то
хотѣвъ батюшка. — Слава а честь буковчанамъ и их к рато-
рамъ Гудикови и Маскаликови.

Ладомировскій батюшка роковину не выбирае, бо онъ каж-
дый тыжденъ выбере отъ своихъ муку и ины потравины и по-

неже барзъ на сухо постить то и яйца, сыръ, масло, молоко прійме. А всьо сончитъ за дарьмо, але одну молитву, яку скончivъ надъ одною хворою женою на 50 Кч цѣнить, а къ тому и належный повоз, бо барзъ мае подергъ чоботы а босый не може ходити! (Заслано!)

— Шизматики „дѣйствують“. Гр.-кає. вѣрники в Илници и Новоселици до лѣта с. г. были спокойнѣ. Одна незначительна часть обывательства сих сел законно переступила еще годами переже в роскол адвентистов, но другъ жителъ прилѣплялися к своей вѣрѣ и церкви. Мѣсяця августа с. г. упокоився старый священник илницкого прихода и шизматицѣ агитаторы сейчас почали свою хитру роботу, чтобы забаламутити головы честных гр. кає. вѣрников и перевести и сей приход на большевицкое кривославіе. В Новоселицѣ еще прежде смерти покойного священника о. Г. Илницкого завели агитаторы до церкви одного батюха, а то с таким намѣреніем, что если справоватися буде, най останеся, если же нѣт, проженеме го. Понеже шизматики незаконно ограбили церков, гражданска власть дала ю заперти и так стояла она за нѣсколько тыждней, пока Правительство Епархіи заслало своего уполномоченого, чтобы утѣшити ревных и вытревалих гр. каєоликов и передати им в дальнєше употребленіе их красну церков. Передача и примиреніе от батюха оскверненої церкви случилося 11. IX. с. г., на Усѣкновеніе так, что нашѣ доброѣ вѣрники 21. IX. на Рожд. Пр. Д. М. храм церкви уже дома и спокойно могли праздновати. Шизматики як доти так и от тогды с большевицким терроризмом нападаюти на гр. кає. вѣрников и священников, но сіи неустрашимо организуются и с христіанскою любовю и силою законов обороняютъся против антихристичных нападов „святого православія“. В Илници также зробили агитаторы „штурм“ против гр. кає. церкви, но там им ничего не удалось, только нѣсколько „служб“ с батюхом под дичкою. Теперь также заганьбилися и сидять, як коробки под стрѣхою. Вѣрнѣ сыны и дочери гр. кає. церкви и вѣры! Напоминаеме вас: не вѣрьте безочливым брехням и ложам шизматицким. Ваш календарь никогда не измѣнится, вы не станете папишами, но с своими дотеперѣшними св. обрядами и звычаями позостанетеся на правдивом, спасительном пути, во церкви и вѣрѣ ваших отцов, а шизма низка лож открыеся и служити буде в смѣх кождого тверезого русина гр. каєолика.

— На ческого владыку не е закона? Чось такое. Дня 16. IX. 1923. у Вульховцях (ж. Марамарошка, округ пана д-ра Ю. Комаринского) прійшов до гр. кає. церкви якійсь чужий-шизматицкій епископ и там супротив волѣ гр. кає. вѣрников отправив богослуженіе. Из сего повода атьоц А. Рацин (родом из В.-Шарду а ходом из Америки) розказав множество когутов зарѣзати. Сесѣ изробили великий „гевалт“. Пан *verchný stražní Menta* мав в себѣ думати, что ачей *jistě* выбухла револуція.

Еще счастье, что не погибли всѣ когуты. Оден Когут котрого атьоц А. Рацин принял за зятя своего — быв 21. IX. 1923. в Нересницѣ „рукоположен“. (Христище говорят). Так еще не пропала надѣя, что со своим высшеупомянутым епископом научить и его известный терновскій сѣльскій бубнаш именем Чапитлѣ по законам из р. 1848 XX. §. 7 из р. 1868. LIII. § 1—8. т. е что : „до чужих церквей не пхайтесь, як и отьоц Рацин“ !

Просиме всѣхъ тыхъ, котрымъ послали'сме чекъ, неотмѣнно заслати намъ на томъ назначенну цѣну. Не шкодуйме тыхъ геллеровъ на оборону вѣры, коли непріятель миллионы жертвуютъ на знищеня Христової Церкви!

— Ювилей. 7-го окт. святковав 50-лѣтній ювилей священства о. Михаил Бачинскій пенз. священик в Блатном Ревищѣ. Много пострадавшаго (головно от луцанских звѣрей-шизматиков) духовника из сего случаю сердечно поздоровляе Благовѣстник.

— Похороны бл. пам. Стояна. 2-го окт. отбылися похороны бл. п. митрополита оломоуцкого Стояна. Похороны кончив паскій нунцій. Тлѣннѣ останки митрополита повезли до Велеграду, где и мощи св. Мародія славянского апостола спочиватю.

— Митрополит Шептицкій в Львовѣ. На конецъ дочекались великой радости нашъ братя галицкѣ русины гр.-каѳолики. 5-го окт. вернувшись ихъ возлюбленный митрополит д-р Гр. Шептицкій послѣ тяжкихъ трудностей до Львова в свою резиденцію. Торжественное привитаніе польска влада запретила; лиш тайно могли нашъ братя радоватися его пришествію. Но сеся щира ра-

дость наповнила кажду бѣду руську хату, бо не має еще одного такого любимого мужа той бѣдный христіянскій народ, як митрополита Шептицкого.

— **Батюшка, кто ключи краде и до того збыткуеся.** В минувшомъ числѣ помѣстили'сме опроверженіе батюшки Чоканы, в которомъ говорить, что онъ николи ключи не крав. Знали'сме что батюшка правду не говорить, но чтобы еще лѣпше выявилася лож батюшки однак помѣстили'сме. Теперь достали'сме слѣдующое заявление : „Я Иван Галага сим обяляю, что я ключ от нашей церкви Иван Чокинови недав в велику Пятницю, але он сам — коли мене дома не было — зайдов до моей властной хижи и ключ от церкви взяв с собою. Коли жандары припили до мене за ключами, тогда я послав их до Ивана Чакины. И потом, коли они из Перечина принесли, тогда я ключ достав назад“. Улич Крива 7. X. 1923. Иван Галага, церковник. — Но батюшко, та кто крав ключи?

— **Война с звонами.** Россійскѣ комунисты ухвалили забрати из церквей всѣ звоны на фабрику лѣтаков. Ладяться на нову войну воздушну. Забудуть, что еще ніяка держа-

ва не выиграла войны от церкви одобренными добрами; не было се так и с нещасною Австрією!

— Як судить свѣт о нас? Галицкій „Міссіонар“ пише: „На Закарпатю не устає боротьба схизматиків с гр.-каєоліками. Множаться там всякі батюшки як щури (цацкуни) в млинѣ и розлазяться по селах, бунтують людей, вдираються до церквей, выкликують бойки и заколот, сварки и процесы... Батюшками твориться всяка сволоч и шумовина, кто до вѣры и релігії только розумѣє, як гайдук до звонарства. Але за то всякими брехнями баламутити темний народ, где треба, то и биткою робите собѣ дорогу — до сего таї батюшки як раз надаються“. Красна фотографія!

— Заслали до нашої редакції один „Православный Вѣстник“. Слабенька ческа газеточка писана по россійски. Надѣмесь, что велику шкоду не зробить меже христіянами.

Короткѣ вѣсты. При жупных выборах на Словенском найбóльше мандатов достала христіанска партія ludakov, из 211-ох 67. — Нѣмецка марка (котра лѣпша была перед воиною од наших грошей) так упала, что тепер за одну ческу корону даютъ 37 милліонов марок. — Римскій отецъ поддержує на приморю Малой Азіи выше 800 грецких сирот. — В Египтѣ нашли стародавній рукопис св. Писанія из рока 400 по Христѣ. — От 1-го октября так в Россіи як и в Югославіи заведеній новый календарь. Но та хто губить вѣру? Ци не самъ „православнѣ“ (схизматики)?

— Заплата за нашъ труды. Досталисме слѣдуючѣ строчки из Галичини: „Благовѣстник нам тут дуже подобаєся и всѣ маєме для Вас В препод. Отче Редакторе велике узнання за трудну а так важну працю при выдаваню гр.-кає. органу. Нема сумнїву, что „Благовѣстник“ красще редактований от многих духовных газет и интереснѣйший“.

Иос. М. Ч. св. В. В.

— Свобода вѣры. На „Здиги“ много процесій греко-каєоліков ишли до Боронявы на праздник. Процесіи греко-каєоліков переставали на дорозѣ шизматики и примушовали их вертати до дому. Се т. зв. свобода вѣры!

— Найлѣпшѣ звоны можно куповати у першої фірми цѣлой республики: ОКТАВ WINTER, Brumov (Сечу). Кто хоче звоны куповати, най ся звертає за информацією до „Благовѣстника“. Подаме вдячно точнѣ цѣны. Оден килогр. около 30 кч.

РЕДАКТОР-ИЗДАТЕЛЬ:
АВГУСТИН ВОЛОШИН.

ОТВѢЧАТЕЛЬНЫЙ РЕДАКТОР
ЕМИЛІЯ БОКШАЙ

ТИПОГРАФІЯ АКЦІОНЕРНОГО ТОВАРИСТВА „УНІО“ В УЖГОРОДЪ.